



©WILFRIED-DECHAU.DE

Quant po custar lavur intellectuala?

DA PRISCA ROTH

■ **Jau ses vid mes computer e ma pre-par a chasa u a l'Archiv chantunal a Cuira per mia incarica a l'Universitad da Lucerna: Per in semester main jau qua sco docenta in seminari davart la vita e las debattas actualas areguard «la societad alpina a la fin dal temp medieval ed a l'entschatta dal temp modern».** A medem temp fatsch jau emprimas retschertgas per in eventual cudesch davart l'emigraziun grischuna a Genova e sun adina puspè en la citad da port per ramassar infurmaziuns e stabilir contacts. Ultra da quai elavuresch jau per la Scola auta da pedagogia a Cuira ina proposta per in percurs da studi en «istorgia applitgada» e porsch durant l'onn per futuras scolastas e magisters differentas emnas da studi che tematisesch a maun d'ina regiun: l'architettura, las baselgias, la chatscha, la planisaziun dal territori, las vischnancas, l'emigraziun ed auter pli. La saira tard repass

jau lura sco gia tantas e tantas giadas mia dissertaziun e zambregel vi da la varianta finala dal text che duess proximamain ir en stampa. E per la finanziaziun dal cudeschs scriv jau en passant anc dumondas da sustegn. Ah gea, davant porta è anc in referat davart la Refurmaziun, per il qual jau pos ir aposta en Bergiaglia. D'insanua stoss jau anc far liber dus dis da lavur per la preparaziun.

Laschain qua d'ina vart tut ils basegns da mes quatter uffants. Uffants èn gron-dius, els sa procuran e pretendan (ad auta vusch!) quai ch'els basegnan, e na sa laschan metter senz'auter a chantun. La dumonda – forse ha quai da far insatge cun la vegliadetgna – che jau ma tschent il davos temp adina puspè: Daco na sun jau cun tut questas lavurs multifaras, cun mias qualificaziuns fundadas, cun la scolaziun che ha durà plirs onns, cun mia flexibilitad ed engaschi buna da segirar in quart da las entradas en famiglia? Franc: Quant po custar la lavur d'in istoricra promovida che scriva la monografia dad

ina vischnanca? E quant la lavur d'in in-schigner che projectescha la sanaziun d'ina via communal? Sin basa da mias experientschas è la resposta clera: Sch'jau propon da metter a quint per mia lavur la medema tariffa per ura sco mes mecanist da velos, hai num unisono e senz'exceptziun: «Quai è bler memia char! Nus dumandain per il referat noss reverenda e per l'istorgia da vischnanca in magister pensiunà.»

Mes figl, che fa ses segund onn d'em-prendissadi sco scrinari, scurlatta mo il chau e ma titulescha da «pazza» e cucca: «Quai fiss», di el, «sco sche in da noss clients ma purtass il lain e schess: cun quest material ma construeschas gratis e franco la stgaffa. Na faschess jau mai!» Tge duai jau qua sco veglia mamma promovida responder? «Jau hai eba plaschair da mia lavur»? Quai fiss in affrunt nunditg per mintga bun mastergnant, tenor mai!

L'autura è istoricra e docenta a la Scola auta da pedagogia dal Grischun